

**Yuhannáay Saymi Kágad**

# Yuhannáay Saymi Kágad

## Drud

**1** <sup>1</sup> Cha kelisáay kamáshay némagá pa dordánagén Gáyusá ke pa del maná sakk dóst ent. <sup>2</sup> Oo dordánag! Dwá kanán ke tai sajjahén kár pa sharri démá berawant o tai jesm o ján ham, tai ruhay paymá dráh o salámat bebit. <sup>3</sup> Báz gal o shádán bután ke lahtén sangat átk o gwáhiesh dát ke taw rástiy wapádár ay, bezán wati zendá rástiy sará gwázenagá ay. <sup>4</sup> Hech chizz maná cha eshiá géshter shádána nakant ke beshkonán mani chokk rástiy sará zenda gwázénant.

## Brátáni madat kanag

<sup>5</sup> Oo dordánag! Taw brátáni<sup>a</sup> sajjahén kárán gón wapádáriá kanay, toré á bégánag bebant. <sup>6</sup> Áyán, báwarmandáni démá pa tai mehrá gwáhi dáttag. É sakkén sharrén káré bit ke taw áyán hamá paymá sát o saparán rawán bekanay ke Hodáay razá ent. <sup>7</sup> Chiá ke á pa hamá námaygi<sup>b</sup> sar geptagant o cha nábáwarán<sup>c</sup> komaké nageptagesh. <sup>8</sup> Gorhá má býad ent choshén mardomán madat bekanén, tán má pa rástiy démá baragá hamkár bebén.

<sup>9</sup> Chizzé pa kelisáyá nebeshtagon, bale Diutripis ke masteriy lóthók ent, may ehtiárá namannit. <sup>10</sup> Wahdé wat byáyán, áiy káráni hesáb o ketábá kanán, chiá ke may helápá drógén bohtám sheng o tálán kanagá ent. Pa inchoká ham bassa nakant, brátán wasshátka nakant o á degarán ham ke brátán wasshátka kanaga lóthant pa é kárá naylit o áyán cha kelisáyá dara kant o gallénit.

<sup>11</sup> Oo dordánag! Badiay randgiriá makan, nékiay randgiriá bekan. Harkas ke nékia kant cha Hodáay némagá ent, bale á ke badia kant Hodái nadistag. <sup>12</sup> Sajjahénán, Dimitriusay bárawá sharrén gwáhi dáttag, tantaná rástiy jendá ham. Má ham hamé dhawlá gwáhia dayén o wata zánay ke may gwáhi rást o barhakk ent.

## Goddhi habar

<sup>13</sup> Bázén chizzé hastat ke pa taw benebeshténán, bale nalóthán gón kalam o kágadá bebant.

<sup>14</sup> Ométwár án ke pa hamé zután tará begendán o dém pa dém gapp o trán bekanén.

<sup>15</sup> Tará sohl o ásudagi sar bát! Dóst tará drud o drahbáta gwashant. Taw ham dóstán yak yakká pa nám, drud o drahbát sar kan.

# Yuhannáay Saymi Kágad

© 2019 Wycliffe Bible Translators, Inc.

Gón Báibalay rajánk kanókén thimay komakká

[Creative Commons Attribution-NonCommercial-NoDerivatives 4.0 International License](https://creativecommons.org/licenses/by-nc-nd/4.0/)

<sup>a</sup>1:5 “Brátay” máná har báwarmand ent, mardén o janén.

<sup>b</sup>1:7 Bezán Issá Masihay nám.

<sup>c</sup>1:7 Asligén Yunáni nebeshtánka gwashit: “cha darkawmán”.